



UKA 2025/11
30/9-2025
Justus Hansen

2024-mut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Akileraartarnermullu Naalakkersuisoq)

(Siullermeerneqarnera)

Qujanaq Naalakkersuisut 2024-mut Nunatta Karsiata naatsorsuutaasa saqqummiunnerinut. Demokraatinut pingaartuuvoq, naatsorsuutit isummerfiginissaat piviuserpalaartumik akisussaassuseqartumillu isummerfiginissaat. Naatsorsuutaapput, kukkunersiuisunik nangaanartortaqaanngitsumik oqaaseqarfigineqartut, taamaattumillu soorunami tamanna akuersaarneqartariaqarluni. Aammali naatsorsuutaapput, aammaarlutik inuiaqatigiinni aningaasaqarniarnitsinni ajornartorsiutinik itinerusumik tunngaviusunik ersarissaaqqittut.

Paasivarput, Nunatta Karsia 2024-imi 250 millioner koruuninik amigaartoorsimasoq, taakkuninngalu 125 millioner koruunerpassuarnik ajornerulluni, missigersuusiarisimasaraluatsinniit. Nikinganerit pingaartumik naatsorsuutaasimagaluamit isertitakinnerunernit pissuteqarput, namminersorlutik oqartussanik pigineqartunit ingerlatsivinnit iluanaarutit naatsorsutigineqartunut naapertuutinngilluinnarsimmamata. Taakku saniatigut maluginiagassaavoq, minnerunngitsumik peqqinnissaqarfimmi aningaasartuutit qaffasinnerusimasut, napparsimasut nunani allani passunneqarneranni aammalu sulisut attanniarneqarneri sulissarsiornerullu aasit ajornartorsiutaasimanerisa aningaasartuuteqarnerusimanerput pissutaasimasut.

Taakkua uppersarsarpaat assiliaq, nalunngisarput takutippaat: Aningaasaqarnerput aserujasuusoq, isertitassat siammasinngikkaangata aalaakkaallutillu, aammalu pingaartitagut soorlu peqqinnissaqarfiup aningaasaliissutaasut sipporsimatillugit. Taamaattumik eqqortuuvoq pisariaqarlunilu, uagut politikkeritut akisussaasuussugut missigersuusiat malinnissaannut sukaterinissamik, aaqqissuusseqqiinissanik aammalu aningaasaqarnerup siammasinnerusumik aallaaveqarnissaanik pisariaqartitsinermik tikkuartuigutta.

Tassungali ilutigalugu naapertuilluartuliortariaqarpugut ineriartornermut aallartinneqareersup, ineriartornera nakkutigalugu. Naalakkersuisut 2026-imut Aningaasanut Inatsisissatut siunnersuummini suliniutissat arlallit saqqummiuppaat, 2024-imut Nunatta Karsiata Naatsorsuutaanut ajornartorsiutaasimasunut tunngatinneqartut. Taamaattumik Aningaasanut Inatsisissatut siunnersuummi pisortat allaffeqarfianni annertuumik eqaallisaanissamik siunertaqarpoq. Anguniagaq sipaarniarnerinnarmik pinnani, aammali sulianut pingaartinneqartunut nukiit atorineqarsinnaniassammata aammalu innuttaasunik sullissinerup pitsaanerulersinnissaanik. Qarasaasianik atuinerulernermi suliallu nutaamik aaqqissuuttalernerisigut, ajornannginnerusumik aningaasatigullu attanneqarsinnaanerumik pilersitsisinnaavugut

Taamaapporlumi peqqinnissaqarfimmut tunngatillugu. Tamatta nalunngilarput, unammilligassani



DEMOKRAATIT

annertunerpaanut ilaasoq, aningaasartuutit missigersuutaasimasuniit annertunerusumik ingerlapallattarlutik. Taamaattumik nuannerpoq, tigussaasunik suliarerusutanik takusinnaaleratta, sulisussarsiornerup nukittorsarnissaanut tunngatillugu, aaqqissuussaannerup pitsanngorsaarnissaanut, aammalu peqqinnissaqarfimmi pissutsit pitsanngorsarsinnaalerlugit Danmarkip suleqatigineratigut. Sinaakkutissatut isumaqatigiissut, Naalakkersuisut Danmarkimi naalakkersuisuinut isumaqatigiissutigisimasaata, kingunerissavaa, Danmarkip 2026-imiit kalaallit napparsimasut danskit napparsimavianni passunneqarnerannut aningaasartuutininik matussusiisarnissaat. Suliniutaavoq, toqqaannartumik peqqinnissaqarfitsinnut oqilisaassisussaq aammalu tassunga ilutigalugu passunneqarnissaminnik pisariaqartitsisunut ammaassisussaq.

Sinaakkutitut isumaqatigiissut allanik imaqarpoq, siumut tikkuussisunik. Atortulersuutininut aningaasaliinerit soorlu Ittoqqortoormiini nunap immikkoortortaani mittarfik nutaaq, Qaqortumilu talittarfissaq aningaasaliissutaapput, nunarput tamakkerlugu inerisaasuusussat piffinnilu inuussutissarsiornermik annertusaallutik. Taakku saniatigut aningaasaliissutissanut aingaasaateqarfiit kalaallinit nakkutigineqartut pilersinnissaannut periarfissat sakkuusinnaapput pingaarutillit aningaasatigut nukittuumik toqqammaveqarnissamut aammalu aaqqissuusseqqiinerit, tamatta oqaluuserisatsinnut, tapertaasinnaallutik.

Demokraatinut pingaarnerpaavoq, unamminartut periarfissallu tamaasa qissimigaarnissaat. Aap, 2024-imut naatsorsuutit isumakulunnartumik amigartoornermik takutitsipput. Tassungali ilutigalugu takuarput, 2026-immut aningaasanut inatsisissatut siunnersuummi aamma Danmarkimut sinaakkutitut isumaqatigiissuteqarnermi maannakkut ilorraap tungaanut aallartoqarsinnaalersoq. Uppilersippaatigullu, ineriartorneq tamanna ilorraap tungaanut saatinneqarsinnaasoq.

Isumaqarpugut, aningaasaqarnikkut politikkimut killiffimmut nutaamut allorialersugut. Killiffik, ajornartorsiutit oqaluuserineqaannaratik, timitaliinerimik kinguneqartussat. Missigersersuusiorneq sukanganerusoq, pisortat allaffissornerannik nutarsaanertalik, peqqinnissaqarfimmi nukittorsaanertalik attaveqaasersuutinillu aammalu inuussutissarsiornermuut aningaasaliinerunerit aallaavigalugit, periarfissaqalissaagut aningaasarsiornikkut immitsinnut napatinnerulersissalluta.

Taamaattumik oqariartuummut marloqiusaavoq. 2024-imut naatsorsuutit mianersoqqussutitut tigussavarput, aammali periarfissatut atussallutigu tikkuaasinnaanermut, sammivik aalajangerneqareerpoq akisussaanerulernissatsinnik aammalu qajannaannerusumik siunissaqarnissatsinnik. Aqqut taanna ingerlaarfigissavarput, ataatsimoorlutalu atussallugu aammalu amerlanerussuteqarluta suleqatigiinnitsigut.

Taamatut oqaaseqaateqarluta Nunatta Karsiata Naatsorsuutai 2024-imut Kukkuersiunerimut ataatsimiititaliami suliareqqinneqartussatut innersuussutigaaqut.

